

Jemsdi Judahi metamdok pepa youyemguk

Yodakale Mede

Jemsdi pepa youkukneŋ iŋoŋ adi mede momohi fee Bepaŋ'walaŋ metam kwetkwet hatiŋdi titiŋ momohi u yehikaliŋa titiŋdok wendiniŋ yodakaleeŋ youkuk. Jems adi metam fee yehitubulodaune ne mede yoguk u nadinadihiŋ gineŋ nadidakale tineŋ yoŋa yoyout gineŋ mede fee youkuk.

Tiŋa Jems adi mede fafaŋeŋ niŋ indiŋ yoguk: Me Jesu nadisukilitimineŋ adi yadi hogok mu hatiyaneeŋ. Mokoŋ. Adi yadi me nolidok titiŋ momohi tiyemaneŋ. Kaŋ titiŋhik wendi nadisukilitihik fafaŋeniŋ hayemilak wondiniŋ mebi yobihituwaak.

Youtumba mede

1 ¹ Nu Jems, Bepaŋ eŋ Wapum Jesu Kilisto'walaŋ tipilapilaye kwanai-medi Judahi meboŋ 12 dane pupuheneŋ kwetkwet meboŋ noli baŋamhik gineŋ hatitawiŋ, hidi haniutumbaŋ pepa i youhamulat.

Tikamanda diniŋ mede

²Notneye, hidi tikamanda mebimebi mintahambune kaŋ welemomoŋ hogok nadiyaneeŋ. ³Nemek undiniŋ kuyeŋ nadisukilitihik mahamulune kokoidi fafaŋeune hidi fafaŋe hinek tineŋ. ⁴Fafaŋe diniŋ folooŋ hidi'walaŋkade minta hinek tibaak. Unduŋ tubune hidi nemek niŋdok lohilohi tiŋa welemulap mu tineŋ, adi tobo nadisukiliti diniŋ hatihati gineŋ bedidapmaŋ tiŋa me hinek hatiyaneeŋ. ⁵Eŋ niŋ indiŋ. Hidi'walaaniŋ niŋdi nadinadi fuliŋgoŋ lohiŋa kaŋ Bepaŋ ninadiluwaak. Kaŋ Bepaŋ adi metam hogohogok nininto mu tiŋa nemenemek siloniŋgoŋ nililakdi tubumintamimbaak. ⁶Ninadi adi welelufom tiŋa moŋ. Wapum kwambumuŋgoŋ nadisukilitimiŋa ninadiluwaak. Eŋ neeŋ welelufom tiŋa ninadiluwaak adi'walaŋ nadinadi adi sububadi ime luhineŋ fedililikeneune dombuŋoloŋ lolak ala wabiune pupuheneŋ liwe tilak undiniŋ. ⁷Me niŋ undiniŋ adi yadi Wapum'walaaniŋ nemek

nij moŋgolaat yoŋa mu nadiluwaak. ⁸Me nij welelufom be woŋgaliŋ buŋagaliŋ tihatilakdi Bepaŋ'walaaniŋ nemek kedem nemu moŋgolaak.

⁹Me nij Kilisto'walaŋ kayoŋbopneniŋ fofoŋnit hatilak adi Bepaŋ'walaŋ namanda foloŋ loloŋnit tilak doktiŋa nadifo tuluwaak. ¹⁰Eŋ me nij Kilisto'walaŋ kayoŋbopneniŋ bomboŋnit hatilak adi Bepaŋdi nadimimbu fofoŋnit tilak doktiŋa nadifo tuluwaak. Biyagoŋ kuyoŋ, adi wowoŋgimiŋdi sigeneeŋ golopmaiŋ dabugoŋ pilap kumumbaak. ¹¹Mele adi haniŋ labuŋa kudutŋiŋdi kilihikit dalak kaŋ sigeneeŋ wowoŋgimiŋŋiŋ golopmaune tinahukutŋiŋ momooŋ u dapmalak. Undugoŋ hinek metam bomboŋ duhuduhuhinit adi kwanai tomboyoula tihatineeŋ iŋgoŋ oŋ, kumuŋ tineeŋ.

¹²Me nij adi tikamanda mintamimbuune kakiyondaŋ kelekufali hatibaak aditok adi Bepaŋdi nadiune utumba hinek tilak. Biyagoŋ kuyoŋ, adi yadi fafaŋe taulu ulu Wapumdi hatihati fafaŋeniŋ diniŋ mapme kulun mokomimbaak. Woŋ adi metam Bepaŋ welehikdi kahileiŋ aditok gigit yoŋit.

Tikamanda adi Bepaŋ'walaŋkade mu bulak

¹³Kadakaniiŋ diniŋ tikamanda uyadi Bepaŋ'walaaniŋ mu mintalak. Unduŋ doktiŋa me nij kadakaniiŋdok tikamanda mintamimbune indiiŋ mu yoluwaak, "Bepaŋdi tikamanda tinamulak." Nebek niŋdi Bepaŋ kadakaniiŋ titiŋdok tikamanda tuwot mu timimbek. Be Bepaŋdi me nij kadakaniiŋ titiŋdok tikamanda mu timilak. ¹⁴Tikamanda adi talik indiiŋ foloŋ mintalak. Timentimeŋ adi me nij ne'walaŋ silodadi kadakaniiŋ titiŋdok nadigalikalak, kaŋ wondigoŋ gebineŋ hamanelak. ¹⁵Kaŋ silodadi mihiwele tiŋa biyelak adi wou "kadakaniiŋ". Kaŋ kadakaniiŋdi bediŋa kitaŋ kumuŋ tubumintalak.

¹⁶Notneye momohi, hidi mede i mu nadifikaneeŋ. ¹⁷Nemenemek momohi be siloŋ fofohi moŋgokam hogohogok woŋ adi kunumnehi biŋ. Betnik, Hauta Molom, adi'walaaniŋ foiŋ. Biyagoŋ kuyoŋ, adi yadi undubo tiŋ undubo tiŋ mu tilak, be adi'walaŋ titiŋ adi mele gineŋ yatnene woliniŋnikdi kweheyebo tiŋ eŋ muniŋgoŋbo tiŋ tilak undiniŋ mooŋ. ¹⁸Bepaŋ adi biyagoŋ nadikwambunda hinek tuguk doktiŋa medeŋiŋ folooŋ hinekdi waabiŋiŋ-mihiŋiŋye nihitubu-mintaguk. Uyadi metam indiiŋ nemenemek hogohogok tubumintaguk wondiniŋ folooŋ, kwanai kobulineŋ nanaŋe folooŋ koomkoom mintalak unduŋ nabugoŋ tineem nadiŋa unduŋ tuguk.

Mede nadinadi hogokdi folooŋ mu tilak

¹⁹Notneye momohi, i nadiŋeŋ. Metamdi mede nadinadidok lodayaneŋeŋ, eŋ mede yoyodok be kwihita titiŋdok adi malabuda tiyaneŋeŋ. ²⁰Kwihita foloŋ nemek tiŋiŋ wondi Bepaŋ'walaŋ titiŋ didimeniŋ diniŋ talik fai

tilak. ²¹Unduŋ doktiŋa hidi welehiŋ geŋgeŋnit eŋ koŋgolondaŋgoŋ u wabidapmaan, kulemaŋgoŋ hatiŋila welehiŋki Bepaŋ'walaŋ medeŋiŋ welehiŋ gineŋ yetiguk u not timiyaneŋ. Biyaŋgoŋ kuyonŋ, wondigoŋ welehiŋ tutumbadok saŋiniŋ halimilak. ²²Hidi yadi Bepaŋ'walaŋ mede diniŋ folooŋ tubumintaneŋ. Mede magihiki hogok mu nadiyaneŋ. Unduŋ tineŋ adi welehiŋ talamut tineŋ. ²³Nebek niŋ adi Bepaŋ'walaŋ mede hogok nadifit tiŋa folooŋ mu kelerŋ tilak adi yadi indiniŋ: Me niŋdi namanda hanom foloŋ kaŋ ²⁴woonŋ pilap hinek namanda dediniŋgoŋ kalak u agaŋ kaule tilak, undiniŋ. ²⁵Iŋgoŋ nebek niŋ adi Jesu'walaŋ Mede Momoonŋ baigoŋ hinek kadidimeŋ nadihinakaanŋ mede u kaule mu tiŋa momoonŋgoŋ hinek takalihinaŋkaune Bepaŋdi me u kahaŋ timiluwaak. Mede Momoonŋ uyadi Bepaŋ'walaŋ yodoko mede folooŋ hinek, wendigoŋ kadakaniiŋ gineniiŋ ninigitak.

Bepaŋ'walaŋ mede nadiŋa takaliŋa titiŋdok

²⁶Me niŋ adi netok “Nu Bepaŋ'walaŋ Mede Momoonŋ hinek nadiŋa kamehatilat,” unduŋ yolakdi maŋiŋ kedemgoŋ mu kadokolak, adi yadi welerŋ talamut tilak. Me niŋ undiniŋ'walaŋ kayoŋbop hatiŋati u folooŋnit mokit tilak. ²⁷Wapmihi kondiŋahi eŋ tam kahat adi bulaniiŋgoŋ hatibune yabu-ulidoko tiyemdok, be kwetfoloŋ kadakaniiŋ hatak wondi welenik tubugouyewaakneŋ doktiŋa didimeniiŋgoŋ hatidok, wondi biyaŋgoŋ Betnik Bepaŋ adi'walaŋ hebenŋ foloŋ hatiŋati geŋgeŋnit mokit tilak.

Me loloŋnit be fofonit titiŋ kubugoŋ tiyemdok

2 ¹Notneye, hidi Wapumnik holiholiŋenit, Jesu Kilisto nadisukilitimiŋdi me niŋ loloŋnitdok titiŋ niŋ be fofonitdok titiŋ niŋ mu tiyemaneŋ. ²Nu yadi indiiŋdok yolat. Bophik yotneŋ me niŋ fukut homogineŋ tinahukut momoonŋ tiŋa baak, kaŋ adi'walaŋ sigineŋ me niŋ dahidahiŋiŋ bulagineŋ eŋ kadakaniiŋ dahiŋa labaak. ³Kaŋ hidi me dahidahiŋiŋ momoonŋ kudikudinit adi'walaŋkade dauhiŋ diweeŋ indiiŋ nineŋ. “Du buŋa pop foloŋ iŋoŋ it.” Unduŋ niŋa fiyewakaŋ aditok indiiŋ nineŋ. “Du guŋandiŋ yalenŋ” be “Foonŋ bahiiŋ foloŋ uŋgoŋ it.” ⁴Biyaŋgoŋ kuyonŋ, hidi lekiŋgoŋhiŋ foloŋ metam tinahukuthik doktiŋa yehidaneŋiŋ uyadi welehiŋ maaneŋ nadinadi hogoli hinek kamehebiune hatak doktiŋa nemek u tubufikiŋ.

⁵Notneye momohi, mede i yobe nadineŋ. Bepaŋdi metam dedihi yehidaneŋ yabukahileguk? Biyaŋgoŋ hinek, kwetfoloŋ fiyewakahi hatiŋiŋ adi yadi nadisukilitihik duhuduhunit doktiŋa Bepaŋ'walaŋ hatiŋati kobuli kahiledok yehidaneguk. Eŋ uyadi nediyeŋ welehiŋki kahile hinek tiŋiŋ aditok gigit kameyemguk. ⁶Kaŋ hidi yadi metam hambeep dauhiŋ kahakaha yabune meka tiŋiŋ. Biyaŋgoŋ kuyonŋ, nediyeŋ hehiŋiŋafoonŋ kiyap'walaŋ hanagila wiŋiŋ? Uyadi bombonhinitdi tihamiŋiŋ.

7Unduŋ tihamuŋa Bepaŋ negut hatidok nadiŋa Kilisto wou foloŋ hehitomboyoukuk u yopekut tiŋ.

⁸Datok nadilaŋ undugoŋ nokedok nadiluwaan. Bepaŋ'walaŋ Yodoko Mede daŋiniŋ unduŋ youliŋit hatak. Mede u biyagoŋ takaliŋa tubune utumbawaak. ⁹Eŋ metam fukufukuŋgoŋ tiyemineeŋ adi yom tubumintaune Yodoko Mededi metam mede wobu tiŋ wondiniŋ mebi miŋgoŋ tubumintawaak. ¹⁰Nebek niŋ adi Yodoko Mede noli kedem yehiulihiwaak iŋgoŋ kubugoŋ niŋ ulatifowaak adi yadi Yodoko Mede hogohogok ula moŋgofolak tibaak. ¹¹Maŋgande, yohomalam hidi kikabi tiŋa keffile mu tidemeek yoguk adigoŋ du me mu ulukumumbaŋ yoguk. Unduŋ doktiŋa du tamge bikabuŋa keffile mu tibaŋ iŋgoŋ me niŋ binek ulukumumbaŋ woŋ adi du mede wobu tibaŋ.

Yom bibiŋdok mede

¹²⁻¹³Me niŋdi welekulema foloŋ yom bibiŋ mu tiŋa hatibaak adi yadi hatigene kibibo welekulema mu timindok. Yomŋiŋ uŋgoŋ bimimbu halaak. Unduŋ doktiŋa Jesu'walaŋ Mede Momooŋdi Yodoko Mede komi diniŋ folofolok gineniŋ nihifiyakulaak wondok nadinadiŋila mede yoyohik be titiŋhik didimeningoŋ tiŋa hatiyaneeŋ. Welekulemanit hatibaak adi yadi mebi yodapmaŋ nai foloŋ munta mu tibaak.

Nadisukiliti folooŋnit u dediiŋ?

¹⁴Unduŋ doktiŋa notneye, me niŋdi nadisukilitinit hatilat yobaak iŋgoŋ titiŋ kedem mu tibaak, me undiniŋ adi nadisukilitiŋiŋdi kedem mu tubulodawaak. Nadisukiliti undiniŋdi dediiŋ tiŋa kadakaŋ liwe tibe tulune tubulodawaak? ¹⁵I nadiŋeŋ. Me be tam nohik niŋ adi haule be dahidahi eŋ nanaŋe be nemek undihidok baniŋ tulune ¹⁶hidi'walaaniŋ niŋdi me be tam u indiiŋ nimbek, "Du kedem wooŋ hatiluwaan, tiŋa sububa tibaaneŋ ala folooge mutdi mukokome tuluwaan eŋ nanaŋe natoki tuluwaan." Nebek niŋ adi mede unduŋ hogok yoŋa siloŋ mu tibaak kaŋ mede wondi noliŋiŋ u dediiŋ tiŋa tubulodawaak? ¹⁷Unduŋ doktiŋa nadisukiliti hogok tiŋa titiŋ momooŋ mu tibaak adi'walaŋ nadisukiliti u adi kumiŋ yodok.

¹⁸Iŋgoŋ me niŋdi indiiŋ binek yobek. "Me noliyeŋ nadisukiliti tiŋ, kaŋ me noliyeŋ titiŋ momooŋ tiŋ." Nu mede wendok adi indiiŋ tubu-udanewit. Du nadisukiliti tilaŋ iŋgoŋ titiŋ momooŋ mu binek tilaŋ kaŋ nu nadisukilitige diniŋ folooŋ u detiŋa kadakalewit? Iŋgoŋ nu adi nadisukilitine diniŋ folooŋ u titiŋ momooŋ tibene wendi kedem ganindakalewek.

¹⁹Du Bepaŋ kubugoŋ hatilak u agaŋ nadikwambundaŋ. U kedem hinek tilaŋ. Iŋgoŋ oŋ, mede u yabap hekidi maŋ nadikwambundaŋ hehele tiŋ. ²⁰Me walage hambeep, du! Nadisukiliti kedem tiŋa titiŋ momooŋ mu tilaŋ doktiŋa nadisukilitige u folooŋnit mokit tilak.

Titij momooŋdi nadisukiliti ulihilak

²¹Unduŋ tilaŋ ale mebi i nadi! Dadanik Abalaham adi mihinjŋ Aisak Bepaŋdok muni heminj tibene alta foloŋ kameguk, nai uŋaniŋ Bepaŋdi nadimimbune yomŋinj dapmaguk. Uyadi Bepaŋ'walaŋ mede nadiŋa titij kedem tuguk doktiŋa unduŋ tuguk. ²²Unduŋ doktiŋa agaŋ be kalaŋ. Abalaham'walaŋ nadisukiliti u titijŋinj momooŋ dut noŋgoŋ kwanainegumuk. Unduŋ doktiŋa titij momooŋdi nadisukilitinjŋ u miŋgilanŋgoŋ tubudakaleguk. ²³Biyagoŋ kuyoŋ, unduŋ degoŋ tiŋa Abalahamdok Youkudip Mede indiŋ hatak u folooŋnit tuguk. "Abalaham adi Bepaŋ nadisukilitiune aditok nadimimbune me didimeninj tuguk." Unduŋ doktiŋa Bepaŋdi me notne niŋguk. ²⁴Agan be kaiŋ? Bepaŋ adi me niŋ nadisukilitinjŋdok hogok tiŋa nadimimbune me didimeninj mu tilak. Foloŋ hinek adi nadisukiliti tiŋa titij maan momooŋ tubune wondoktiŋa nadimimbune yomŋinj dapmalak.

²⁵Eŋ tali tam Lehap^a adi maan undugoŋ nadisukilitinjŋ diniŋ folooŋ titij momooŋ tubune Bepaŋdi aditok nadiune yomŋinj dapmaguk. Adi yadi meyat Kanahan kwet kanadi tidene ugumukdi adi'walaŋ busuwagumuk kaŋ menot tiyemiŋa talik niŋ gineŋ yapmeune momoŋ ugumuk. ²⁶Wondok indiŋ hatak. Foloŋnik gineŋ munabut mu halune adi kumiŋ. Undugoŋ me niŋ nadisukilitinitdi titij momooŋ mu tilak adi'walaŋ nadisukiliti adi kumiŋ.

Mebelemnik kadoko tiyaneem

3 ¹Notneye, hidi feedi metam yenindidime kwanai titijdok gigne mu tiyaneen. Nadiŋ be? Kougoŋ hatigene Wapumdi mede yodapman tibaakneŋ metam yenindidime kwanai tiyam indi'walaŋ mede didimeniŋgoŋ hinek kanadiŋa yomnikdok kibikoŋ mede malabumuŋgoŋ ninimbaak. ²Indi wanaŋ hogohogok nemek fai tiŋa tubufit kisaŋ tiyam. Me niŋ adi mede niŋ yolak foloŋ kadakaninj mu tilak adi yadi me didimeninj niniŋdok. Me undiniŋdi kayoŋ kohoŋ be folooŋ hogohogok kedem kadokolak. ³Kale wosi heki adi mede tiloloŋ tinimdok masiŋgilingilim mahik gineŋ boiyemam. Unduŋ tiŋa wendigoŋ kale wapuhi u yehitubu-udaneudane tiyam.

⁴Eŋ muwage imenŋwaŋ foloŋ yawiŋ hekidok maan nadiyam. Adi yadi wapuhi hinek tiŋa adi yadi sububa wapum fedila siloneune wiŋ. Inŋoŋ oŋ, muwage kadoko hekidi kuyaŋ kuyaŋ-kabe muwage yehitubu-didimedok tutumbain wendi nehi diŋandiŋ une nadiŋneŋ uŋgoŋ didimeniŋgoŋ tubudidimeen yawiŋ. ⁵Undugoŋ hinek me mebelem adi maan nemek kuyaŋ-kabe inŋoŋ sigitiŋalo kisaŋ tilak.

^a 2:25 Josuwa Fiye 2 eŋ Fiye 6 Yowo 22 wooŋ 25, uŋgoŋ kunali nadidok.

Mebelemniki fana tiyam

Kudup finij adi nemek kuyaniŋ-kabe iŋgoŋ oŋ, kudup-kabe undiniŋdi palagi kakaŋ heune dadapmalak. ⁶Wendiniŋ mebi indij hatak. Mebelemniki adi kudup dabugoŋ dalak. Biyagoŋ kuyoŋ, wendigoy foloonik dikidiki noli yalakapmedapmaan kadakanij fuliŋgoŋ tiŋa metam titiŋnik be hatihatiniŋ kudup heune dadapmalak. Eŋ ne yadi ham gineniŋ kudupdi daŋeŋa dadapmalak. ⁷Kale mebimebi, giineŋhi eŋ imenehi, eŋ bagi eŋ miŋgembet heki, nemek undihi adi metamdi kedem yanagila yehitubu-gatayam. ⁸Iŋgoŋ oŋ, metam diniŋ mebelem adi me nediyey fafaŋeŋ tubugatawaaŋ? Adi yadi lakatanit mokit yakaleyakale tiŋila yom tilak. Woŋ adi miŋgembet muhabo diniŋ maŋiŋ ime upmuŋnit undiniŋ.

⁹Fukuniŋ indij hatak. Mebelemniki Wapum Betnik niutumbayam, eŋ mebelemniki wondigoŋ metam Bepaŋ ne'walaŋ folonamandap medehaki yeniŋa yehitubu-kadakayam. ¹⁰Manik kubugoŋ gineŋ youtumba eŋ medehaki labamuk. Notneye, wondiniŋ mebi dediŋ aŋ? ¹¹Ime dawi kubugoŋ gineniŋ ime buukaŋ eŋ momooŋ wanaŋ kedem be labuŋa wodiwek? ¹²Eŋ notneye, bim foloŋ kalip kedem be mintawek? Be gip foloŋ bim kedem be mintawek? U tuwot moŋ. Tiŋa undugoŋ, luhineŋ feleŋ ime u nanandok tuwot moŋ.

Nadinadisu-fuliŋgoŋ diniŋ folooŋ tubumintadok

¹³Hidi'walaŋhi metam dedigoŋdi nadinadi fuliŋnit eŋ nemek u be u nadidakaleeŋ tiŋiŋdi hatiŋiŋ? Adi yadi nehitok nadiune founa titiŋ kedem u tiŋa nadinadi fuliŋgoŋhik diniŋ mebi miŋgoŋ tubumintayaneŋ. ¹⁴Eŋ welehiŋ gineŋ metam noli'walaŋ nemek yabusiloda tikabeleŋ kwihitaŋ tosiwe tiŋa sigitiŋalo titiŋ uŋgoŋ hayemulune mede folooŋ nadiyam yobune wendi biyagoŋ mu tilak. ¹⁵Titiŋ undihi woŋ adi kunumnehi mu yodok. Moŋ. Titiŋ undihi adi kwetfoloŋniŋ be me niŋ'walaŋ be Sadar'walaŋiŋ yodok. ¹⁶Nemek yabusiloda be sigitiŋalo titiŋ u halune wendok foloŋ tituwali kadakanij noli, danedane be malabumuŋ noli noli fee mintaune kawetiŋaŋ.

¹⁷Metam nediyey Bepaŋ'walaŋiŋ nadisu-fuliŋgoŋ moŋgokiŋiŋ adi yadi titiŋ indij tiŋiŋ. Timenŋ hinek adi welenik walaŋiŋ, agaŋ kulema, agaŋ nadikulema, agaŋ mede tiloloŋ, agaŋ kulemaŋgoŋ hatihati, eŋ Wapum'walaŋ kayoŋbop hatihati diniŋ titiŋ momohi noli. Eŋ noli fukufukuŋgoŋ mu titiŋdok, eŋ mede agaŋ biyagoŋ hogok yoŋa hatidok. ¹⁸Metam kulema hahatdok gineŋ kwanai tiŋiŋ adi yadi kulema foloŋ youli momooŋ diniyeti tubune folooŋ hatihati didimeniŋ mintayemilak.

Datok nadiune fofonit tuluwaaŋ

4 ¹Hidi'walaŋ lekiŋgoŋhik gineŋ mik-kwadi eŋ tosiwe u maŋgoŋde mintalak? Biyagoŋ kuyoŋ, hidi yadi nemek titiŋdok be moŋgotdok

nadigalika tiftit tiinj doktiņa weleulik ginej mik mintalak. ²Hidi nemek hide'walaņ moņ u weleulikdi yabukahileiņ iņgoņ dedij tiņa moņgotneņ, moņ doktiņa molohiye widihikumiij. Hidi metam noli'walaņ nemenemek doktiņa kikakwihita eņ tosiwene-fit tiinj iņgoņ nemek u hidi moņgotna hinaņ mu tiinj. Woņ adi hide Bepaņ mu ninadiiņ doktiņa unduņ tiinj. ³Niņ adi indij: ninadi kwanai tiinj iņgoņ oņ, folooņ mu beij. Uyadi weleulik ginej nadisu hogohi halune nadigalikahik hogok tubulodane nadiņa ninadiiņ doktiņa folooņ mu beij.

⁴Ai, mede yofolok dobuwiyakiij heki hidi! Hidi kudi u tiinj adi tam yohoinitdi yohoi bikabuņa wooņ me noli dut keffile tilak unduņ dabugoņ tiinj. Abe nadiiņ? Me niņ adi kwetfoloņ diniņ nemek wondok nadigalika kisaņ tibaak adi yadi Bepaņ mik timimbaak. Unduņ doktiņa nebek niņ adi kwetfoloņ diniņ nemenemek kedem be kadakaniņ kaka moņgola hatibaak adi yadi Bepaņ mik timimbaak. ⁵Kaņ Bepaņ'walaņ Youkudip Mede ginej mede indij hatak u hidi nadiune folooņnit mokit be tilak? "Welenik ginej munabuli kameguk uyadi Bepaņ netok gigit hogok hatidok gigine hinek tilak." ⁶Tiņa undugoņ siloņ tobogoņ kisaņ tinimilak. Unduņ doktiņa Bepaņ'walaņ pepa mebinit ginej mede indij hatak.

"Bepaņ adi metam nehitok nadiune loloņnit tilak,
adi'walaņ kasop diliteyemilak.
Eņ nehitok nadiune fofoņnit tilak,
adi siloņ tobogoņ tiyemilak."

⁷Unduņ doktiņa hidi Bepaņ gikiņgoņ timiņa medeņiņ nadiyaneņ. Unduņ tiņa Sadaņ moņ niheune bihabuņa momoņ uluwaak. ⁸Hidi Bepaņ'walaņkade wooņ galiune adibo hidi habukahileluwaak. Kadakaniņ titiņ eņ welelufom tihatiij, hidi weleulik youtela tubuwalandayaneņ. ⁹Hidi hide'niņ mebihik nadiņa kobulabulaye tineeņ. Yogegeham tiijdi wabiņa bulanijgoņ tineeņ. Eņ nadifohikdi dapmaune makat kobulabulaye mintawaak. ¹⁰Wapum'walaņ hebeņ foloņ fofoņnit hatibune adi hehitubu-pilalaak.

Kinintubukadaka mu titiņdok

¹¹Notneye, hidi kinintubukadaka mu tiyaneņ. Me niņ adi noliņiņ niņ niņkadaka tiņa nadimimbune tuwot mu tilak adi yadi Yodoko Mede niņkadakaaņ nadiune founē uyakut tilak. Nebek niņdi Yodoko Mede uyakutak adi mede tiloloņ mu tilak. Adi tobo mede uut tiņa Yodoko Mede u hogoli yolak. ¹²Bepaņ, Yodoko Mede nimiņa kadokolak, negoņ metam yehitubu-lodaņ yanagitak eņ yehitubu-kadakalak. Kaņ du yadi nediyeņdi ganindapmaguk doktiņa me noke kibikoņ mimiņdok yodapmaweņ?

Wapumdi nadinimbune tuwot tubune nemek tiyaneem

¹³Agan ale, noli ibo nadiņeņ. Hidi indij yohatiij. Kamiņ be haloņ yokwet uņoņ be uņoņ wooņ muneeņ bombon kwanai tiņa muneeņ

bomboŋ fee tubumintaŋ hatiyanene gulet niŋ dapmaune udaneŋ buneem. ¹⁴Hidige! hidi haloŋ nemek unduŋ be unduŋ mintawek u maŋbe nadiiŋ? Be hidi'walaŋ hatihati u dediniŋgoŋ? Uyadi mundidi labulabuŋjila uŋaniŋgoŋ liwelak undiniŋ. ¹⁵Unduŋ doktiŋa hidi yadi indiŋ yobune tuwot tibek. Wapumdi nadinimbune tuwot tubune kaipmuŋ hatiŋjila unduŋ be unduŋ tineem. ¹⁶Iŋgoŋ oŋ, hidi yadi sigitiŋalo mede fee yoŋa hidetok nadiune loloŋnit tilak. Sigitiŋalo mede uyadi kadakaniiŋ. ¹⁷Me niŋ adi nemek kedem titiŋdok nadinadi u momooŋ hanadigene nemek nadisulak u mu tilak uyadi yom-ku tilak oŋ.

Metam muneŋ bomboŋhik nehitoŋ yabukahile tiŋ aditok mede

5 ¹Nadiiŋ be! Metam bomboŋ duhuduhunit, hidi kougoŋ nemek figitaŋ mintahambaak wondoktiŋa makat kobulabulaye indidegoŋ tiyaneŋ. ²Bomboŋhik u kadakadapmaguk. Dahidahihik fee mumuyeŋ u kalenŋiŋiŋdi nadapmagiŋ. ³Eŋ muneŋ bomboŋhik dahindahiiŋ tuguk, kaŋ dahindahiiŋ wendi hide'walaŋ mebihik miŋgoŋ yobihilune foloohik kudupdi dadapmawaak. Uyadi nai wapum dapmaŋdok nai dulalune muneŋ bomboŋ hogok tiyout tifiŋ tigiŋ.

⁴Nadiiŋ be? Pandiiŋ hide'walaŋ kwanaihik gineŋ moŋgotnaŋ bopnehamgiŋ kaŋ kwanaihik diniŋ tuwaŋiiŋ mu yemiŋa kibida tigiŋ, wondiniŋ yomdi kudige wele tiŋa Bepaŋ'walaŋ loguk. Tiŋa kwanai-metam'walaŋ kobulabulayedi kunumneniiŋ Saŋiniŋ Molom adi'walaŋ magi gineŋ foguk. ⁵Hidi kwetfoloŋ duhuduhunit hatiŋjila kale nanaŋe koban koban hinaŋ kisaŋ bedigiŋ. Unduŋ tiŋa nadifo tiŋa mu naditubaŋ hatilune fidihikumundok nai dulaguk. ⁶Hidi metam didimehi medehik yodapmaŋ widihikumunŋgiŋ. Kaŋ adibo fafaŋeŋ sigihik yalimiŋa hidut mindobu mu tigiŋ.

Folofigita nai gineŋ fafaŋe tiŋa yayatdok

⁷Notneye, hidi Wapum busuwadok woomiŋa gweheye mu tineŋ. Indiŋ nadiŋeŋ: Kwanai molom niŋdi diniyeti tubudapmaŋ folooŋ momooŋ mintadok woomulak. Unduŋ tiŋa gwi mele tuwolit tubune wapumgoŋ eŋ momooŋgoŋ mintadok hati nadilak. ⁸Undugoŋ hinek Wapum'walaŋ nai agaŋ dula hinek tilak doktiŋa hidi undugoŋ gwehegweheye mu tiŋa welehikdi nadifafaŋe tiŋa woomhatiyaneeŋ.

⁹Notneye, hidi yolakata mu tiyaneŋ. Nadiiŋ be? Me mede yodapmaŋ tilak adi agaŋ talik yemeŋ yatak. Adi kuyeŋ hidi'walaŋ mebihik miŋgoŋ yobihilaakneŋ ale hidi kikakwihita be kiyomunumunuŋe mu tiyaneŋ.

¹⁰Notneye, i nadiŋeŋ. Polofet heki Wapum'walaŋ mede tiloloŋ tiŋa adi'walaŋ mede yogiŋ, adi yadi folofigita eŋ bulaniŋgoŋ helemahelamaŋ nadiŋa gweheye mu tigiŋ. Indi maŋ adi tigiŋ undugoŋ tiyaneem.

¹¹Nadiiŋ be? Folofigita nadiŋjila fafaŋe tiŋa hatigiŋ aditok adi indiŋ

nadiyam: Bepañdi yehikahañneej yehitubu-lodaguk. Jopdi fafañeguk u agañ nadiyam, ej mindañkade Wapumdi nemenemek kotigoj kisañ tomboyoula miñguk u maañ agañ nadiyam. Biyagoj hinek, Wapum adi welekulema ej siloññij wapum halimilak.

Mede yofafañe diniñ mede

¹²Notneye, mede folooj niñ iñak. Hidi kunum foloñ yotebitebi tiña yofafañe be kwetfoloñ yotebitebi tiña yofafañe be nemek niñ foloñ yotebitebi tiña yofafañe uyadi mu tiyaneej. Hidi yadi medehik biyagoj uyadi biyagoj hinek yoyaneej, ej moñ kañ u maañ, moñ yoyaneej. Kohodidim wahĩkade tiña yoyaugene yomnit tineenej ala nadinadiñila yoyaneej.

Yagit folofigita gineñ hali indij titiñdok

¹³Indiñ titiñdok, hidi'walaaniñ niñ adi folofigita be bulaniñgoj nadiña hatibaak adi yadi Bepañ ninadiluwaak. Ej nediyeñ welemomooñ nadiña hatibaak adi yadi nadifo tiña youtumba kap toluwaak. ¹⁴Hidi'walaaniñ niñ adi yagit tiña hali kayoñbop diniñ talitimeñ medenai kameyembune buña adut hali ninadi tiyaneej. Tiña Wapum'walañ wou yoña haguwo ime^b folooj foloñ hafiyemiyaneej. ¹⁵Unduñ tiña nadisukilitinit ninadiune Bepañdi me yagitnit u tubukedebawaak. Ej yom nenobu halimimbaak u maañ tumolokulimimbaak. ¹⁶Unduñ doktiña hidi kedeba titiñdok nadiña yom yofiyat tiña ninadidi kikasop tiña tiyaneej. Me didimeniñ niñdi ninadi tubune sañiniñnit ej folooñnit tibaak. ¹⁷Iaija adi me iñgoj, inde nabugoñ. Ala adi gwi mu uutdok gicine tiña ninadiune gwi kwetfoloñ mu ulaña halune gulet lufomkulitniñ ej gulet niñ diniñ faki fukuniñ dapguk. ¹⁸Kañ mindañkade kotigoj ninadiune kunum gineniñ gwi maune kwetfoloñ nemenemek youli kotigoj fee kadoña labugiñ.

Hatihatihik fiit tubune kotigoj yanagitdok

¹⁹Notneye, hidi'walaaniñ niñdi mede folooj diniñ talik didimeniñ u wabiña tubufit talik gineñ uune noliñniñ niñdi talik didimeniñ nindidimeej Bepañ'walañkade kotigoj nagila baak, ²⁰adi yadi mede indij hatak u momooñgoj nadiwaak. Nebek niñdi me tubufit talik keleen kadakanij tilak u nintubudidimeej talik didimeniñ gineñ nagilaak, adi yadi me u munabuliñij tubulodaune kumuñ fafañeniñ mu tibaak. Bepañ adi talik unduñ foloñ yom mohomohok tumolokutak.

^b 5:14 Haguwo ime u bem wou olif wondiniñ kilikidi tutumbayagiñ. Uyadi kukiñ oel dabugoñ.